

VENDIM
Nr. 488, datë 31.7.2018

**PËR DISA NDRYSHIME NË VENDIMIN NR. 424, DATË 10.5.2017, TË KËSHILLIT
TË MINISTRAVE, “PËR PËRCAKTIMIN E KRITEREVE DHE TË PROCEDURËS SË
PËRZGJEDHJES E TË EMËRIMIT TË DREJTUESVE TË SHËRBIMIT NË
STRUKTURAT SHËNDETËSORE UNIVERSITARE”**

Në mbështetje të nenit 100 të Kushtetutës dhe të pikës 4, të nenit 28, të ligjit nr. 80/2015, “Për arsimin e lartë dhe kërkimin shkencor në institucionet e arsimit të lartë në Republikën e Shqipërisë”, me propozimin e ministrit të Shëndetësisë dhe Mbrojtjes Sociale dhe të ministrit të Arsimit Sportit dhe Rinisë, Këshilli i Ministrave

VENDOSI:

Në vendimin nr. 424, datë 10.5.2017, të Këshillit të Ministrave, bëhen këto ndryshime:

1. Kudo në vendim, emërtesat “Ministria e Shëndetësisë” dhe “Ministria e Arsimit dhe Sportit” zëvendësohen me “Ministria e Shëndetësisë dhe Mbrojtjes Sociale” dhe “Ministria e Arsimit, Sportit dhe Rinisë”.

2. Në pikën 2 bëhen këto ndryshime:

a) Shkronja “ç” ndryshohet si më poshtë vijon:

“ç. Të zotërojnë titullin “Profesor”, “Profesor i asociuar” ose të ketë Doktoratë/PhD të mbrojtur në një nga universitetet e Shqipërisë, të BE-së, SHBA-së, Kanadasë, Turqisë, Australisë ose Japonisë.”.

b) Në fjalinë e parë të paragrafit të fundit, fjalët “... jo më të shkurtër se 8 (tetë) vjet si pedagog me kohë të pjesshme ...” zëvendësohen me “... jo më të shkurtër se 8 (tetë) vjet pa ndërprerje si pedagog me kohë të pjesshme në fushën ku ai konkurren...”.

3. Pika 10 ndryshohet si më poshtë vijon:

“10. Kandidatët konkurrues për një shërbim të caktuar vlerësohen nga komisioni përkatës, sipas përcaktimeve dhe kriterëve të përcaktuara në udhëzimin e përbashkët të ministrit të Shëndetësisë dhe Mbrojtjes Sociale dhe ministrit të Arsimit, Sportit dhe Rinisë. Aneksi 1 bashkëlidhur vendimit shfuqizohet.”.

4. Pika 14 ndryshohet si më poshtë vijon:

“14. Kandidati fitues lidh kontratë punësimi trepalëshe me drejtuesin e strukturës shëndetësore universitare, pjesë e së cilës është shërbimi përkatës, dhe me drejtuesin e IAL-së përkatëse. Mospërmbushja e detyrimeve kontraktore që lidhen me funksionimin e strukturës shëndetësore universitare përbën shkak për prishjen e kontratës trepalëshe.”.

Ky vendim hyn në fuqi pas botimit në Fletoren Zyrtare.

KRYEMINISTRI
Edi Rama